



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

Tir Yimyim

tiryimyim@aolima

tir yimyim

TAPAK 8

Rajnath-i armed force dang civil administration yaritsü ajungshi

Chad Tir Idriss Deby tongpang nung tepset



VOL. XVIII NO. 186 (ADOK 186) DIMAPUR

RASEMNÜ (WEDNESDAY)

RONGCHII (APRIL) 21, 2021

₹ 5.00

## Governor Ravi-i tamangba yimsü balala lennirtem ajuru



Mongulbarnü Dr. Imkongliba Hall, Raj Bhavan, Kohima nung Nagaland Governor R.N Ravi-i tamangba yimsü balala nungi lennirtem den ajurutepa senden amenba angur. (Kohima, April 20)

**Dimapur, April 20 (TYO):** Nagaland Governor R.N. Ravi-i Nagaland nung tamangba yimsü balala teloktem nungi lennirtem den COVID-19 atema senden ka menogo.

April 20, 2021 nü Dr. Imkongliba Hall, Raj Bhavan, Kohima nung sendenji ayonga amen. Iba senden nung Hindu, Muslim, Jain, Sikh, Buddhist aser Indigenous faiths lennirtem aden.

Senden nung Governor Ravi-i Nagaland nung COVID tensa osang lemsatp aser iba ama

tensa balaka nung nisung ajak yaritepa inyaksü nungdaker ta ashi.

"Tamangba yimsü lennirtemi nübortem dang COVID-19 inyakyim benschitsü atema osang prokshitsüla aser vaccine agitsü ajungmesotsüla" ta paisa metetdaksü.

Senden nung adenertemia parnok tebilembatem metetdaksü aser itemji Governor-i state sorkar dangi abentsü nangzük, ta PRO to Governor sangdong ka nung ashi.

## COVID-19 Nagaland: Nisung 82 dak putet

**Kohima, April 20 (TYO):** Mongulbarnü Nagaland nung nisung 82 dak COVID-19 aliba putet aser parnok züngsema nisung ajak agi 12,650 kümogo.

"Tanü nisung 82 dak COVID-19 putet. Parnokji Dimapur nung 70, Kohima nung 11 aser Tuensang nung 1 lir" ta Health & Family Welfare Minister, S Pangnyu Phom-i metetdaksü.

Nisung 12,650 rongnungi 12,110 taneptsü nguogo aser tang nisung 25 anepaludar, ta paisa ashi.

"Nagaland nung COVID-19 nungi taneptsü angur 95.73% lir. COVID-19 puteter nisung 94 asü saka parnok 10 bo tanga timtem ajanga asü" ta State Nodal Officer for Integrated Disease Surveillance Programme, Dr Nyanthung Kikon-i metetdaksü.

Nisung 189 tashi tanga state temi ogo. Tang anepalurtem rongnung nisung 23 dak

shirangba yimya terara lir saka 234 dakbo tajitetsü mali, ta paisa ashi.

Nagaland nung COVID-19 alitsü akok ta temolung melemi bilemba sample 1,41,093 tendangogo. RT-PCR ajanga 76,449, TrueNat ajanga 37,797 aser Rapid Antigen Test ajanga 26,847 tendang.

"Hombar tashi nung Nagaland nung nisung 1,23,601 nem covishield indang dose 1,57,293 agütsüogo" ta State Immunization Officer Dr Ritu Thurr-i ashi.

Vaccine agirtem rongnung frontline workers 424,090, healthcare workers 13,508, teintet rogo 33,755 aser arishi küm 45 temapur 32,248 lir.

Parnok rongnungi frontline workers 21,547, healthcare workers 9,158, teintet rogo 2,031 aser arishi küm 45 temapur 956-i dose anaprong agiogo, ta Dr Thurr-i ashi.

## COVID-19: Linük balalai India atema tenokdangba agütsür

**New Delhi, April 20 (Agencies):** India nung nisung aika dak Covid-19 putetba ajanga linük balalai tenokdangbatem agütsür.

Hombar aonung United Kingdom indang travel "red list" nung India züngsem aser iba sülen mapang tatsüka dang lir US Centre for Disease Control and Prevention (CDC)-ia "Senzüsenbongertemi India-i maotsüla" ta osang metetdaksü.

Deobarnü Hong Kong-ia "emergency circuit breaker" tenzük aser anogo 14 nü atema India nungi tayimtsütem marutsü tenokdangba agütsü. New Zealand-ia tan ita tetenzüklen nungi India nungi nisungtem

marutsü tenokdangba agütsüogo. India nung nisung 103 dak coronavirus variant balala mezüng putetba agi travel "red-list" nung dendaksür, ta UK-i metetdaksüogo.

Hong Kong-ia India nung coronavirus strain balaka putetba atema hopta ana tayimtsütem tenokdangba agütsür ta ashi.

India nung Covid-19 assessment Level 3 nungi Level 4 aküm aser iba ya timtiba lir ta shia US CDC-ia senzüsenbongertem dang kümdangtsü ashi.

Mongulbar anepdang 8:00 ako tashi nung India nung COVID-19 puteta anepalur nisung 20,31,977 liasü.

## DoSE-i tesayurtem aser staff dang pei mapa inyakdak toktsür maotsü tuyur

**Dimapur, April 20 (TYO):** Department of School Education nung mapa inyaker ajak pei pei mapa lemzüka alidak toktsür maotsü tetuyuba agütsüogo.

Sorkar school tem nung tesayurtem, Staff, DEO/Sr. SDEO/SDEO nung mapa inyaker ajaki bangdakpur dang nungi Station Leave Permission magii tangaleni aotsü makok, ta DoSE-i metetdaksüogo.

Sorkar tesayurtemi Class 1 nungi 8 tashi Explanatory Notes, Worksheets, Assignments amala renemtsü. Maneni, school tekolakpurtemi kaketshir tsürabur nem hopta nung khen mesüra anaben notes/Worksheets/Assignments agütsü atema mapa inyaksüla, ta Principal Director, Shanavas C, IAS-i sangdong ka nung metetdaksüogo.

Tsüraburtem/kaketshirtem dang Worksheets/Assignments agütsü atema anogo metetdaksütsü aser school temi

ibaji agizükba den ano Notes, Worksheets/Assignments tasen agütsütsü, ta sangdong nungsa shia lir.

Tsüraburtemi pei chirnurtem atema Worksheets/Assignments nung temolung agütsütsüla aser Online/Digital ajanga class agidang yariteptsüla.

Nagaland nung Digital/Online mode ajanga class agitsü ajungmesor aser 2020 lockdown mapang class 5 nungi 12 tashi Video Lessons sayuba ajak Youtube Channel (DoSE Nagaland) aser Facebook Page (School Education, Nagaland) nung lir. Anungji tesayurtem aser kaketshirtemi item video amshitsüla aser ano department-i digital/video lessons talila agütsütsü, ta DoSE-isa metetdaksüogo.

Class 9 aser temapur atema SOPs benschia class agitsü. Iba osang ya Teachers' Diary nung bendentsüla aser mapang shia School tekolakpurtemi sign

asütsü. Teacher's Diary tasen yakta agütsütsü, ta DoSE-isa ashi.

April 28, 2021 nungi tenzüka anogoshia nikonngang 4:00 ako matongdang School tekolakpurtemi Online School Monitoring Portal (<https://school.dosenl.in/>) nung Daily Activities den tesayurtem indang attendance report upload asütsü, ta parnokisa metetdaksüogo.

School tekolakpur dena sorkar school tesayur ajaki Teacher's APP nung tenüng zülüoktsüla aser School tekolakpurtemi iba mapa ya ketdangtsüla inyaksü.

Number meputepba ajanga Teacher's APP nung tenüng magütsütetertemi April 26, 2021 tashi nung pei pei DEO/Sr. SDEO/SDEO ajanga MS Excel File nung ([reports.dosenl@gmail.com](mailto:reports.dosenl@gmail.com)) dangi osang yoktsüla, ta DoSE-isa metetdaksü.

## Nagaland nung Food Processing atema website ka lapok

**Dimapur, April 20 (TYO):** Nagaland nung Department of Industries & Commerce (DoIC)-i PM Formalization of Micro Food Processing Enterprises (PM FME) Scheme atema website ka lapokogo.

April 20, 2021 nü Industries & Commerce Director, K. Hokishe Assumi-i State Official Website ([www.pmfme.nagaland.gov.in](http://www.pmfme.nagaland.gov.in)) lapoktsü.

"PMFME Scheme ya Ministry of Food Processing Industries (MoFPI), GoI-i state ajak nung

tenzüksüogo aser iba ya 2025 tashi inyaksü" ta K. Hokishe Assumi-i ashi.

Nagaland nung food processing sector ya ano junga mamentet lir. Nagaland nung yangluba chiyungtsü aika packaging, labeling, registration aser license shitak maliba den jenjang tip matem lir. Anungji, iba scheme ajanga One District One Product (ODOP) system nung ajemdaker jenjang tilatiba nung entrepreneurs yaritsü, ta paisa metetdaksü.

Iba Scheme kübok ketdangtsürtemi local entrepreneurs yaritsüla aser tajangzüktem agütsütsüla, ta Director Hokishe-isa ayongzük.

Ia scheme ya Line Department tem yaritepa inyaksü anungji ketdangtsürtemi mapang shia Line Department den amalitepa takok ngua inyaksüla, ta paisa ashi.

Tanü lapokba website nung scheme information, guidelines, video tutorials, handbooks, DPR templates aser tanga osang balala lir.

## Lockdown tsübuba agi aayangertem pei pei talidaki aoer

**New Delhi, April 20 (Agencies):** India nung yaküm küm ama lockdown alitsü akok ta tsübuba bilemba ajanga yimti balala nung aayanga alir nisung aika pei pei state-i aotsü tenzükogo.

Tangalen nungi aayangi arurtemi bus terminals aser railway stations nung mesemi adenshir pei pei talidaki aoer. New Delhi nung anogo 6 nü lockdown asütsü sangoktsüba sülen Hombar aonung Anand Vihar Bus Terminal, Delhi nung tangalen nungi aayangi arur nisung aika adenshia liasü.

Ajisüaka, Mongulbarnü Delhi lieutenant governor Anil Bajjal-i aayangi arurtem dang parnok mapa inyakdak malitsü den chiyungtsü mangutsü ta aayangertemi tsübur.

aayangi arurtem dang parnok mapa inyakdak malitsü den chiyungtsü mangutsü ta aayangertemi tsübur.

Covid-19 agi timtemba mapang Delhi sorkari aayangi arurtem yaritsü ta Baijal-i metetdaksü.

"Nenok atema teinyaksü ajak inyakogo. Nenoki meranga inyakba ajanga Delhi liteta aoer aser iba ya yimti ya nenok meyong lir" ta paisa ashi.

Delhi nung dang masü saka Tamil Nadu nunga aayangertemi railway station balala nung pei pei state-i meyipa aotsü atema adenshir.

Lockdown aliba ajanga

aayangi arurtem dang parnok mapa inyakdak malitsü den chiyungtsü mangutsü ta aayangertemi tsübur.

Gujarat, Karnataka, Maharashtra aser Delhi nungi Odisha kübok Bhubaneshwar aser Berhampur-i aruba train tem nung nisung mesemi arur.

Mongulbarnü Indian Railways kübok Northern Railway zone-i taruba anogo asemnü atema New Delhi nungi Bihar aser Uttar Pradesh-i aoba special trains bendenlokogo.

Ayangertemi pei pei talidaki bushia aoba nung yariteptsü atema Indian Railways-i train talila agütsür.

## Mariani nung Kumbh Mela nungi arur dak COVID-19 putet

**Jorhat, April 20 (Agencies):** Jorhat district kübok Mariani railway station nung Kumbh Mela nungi meyipa arur nisung 16 dak COVID-19 putet.

April 19, 2021 nü Mariani nung nisung 24 dak COVID-19 aliba putet aser parnok rongnung Kumbh Mela nungi arurtem dena lir. Haridwar nungi Rajdhani

Express ajanga arur nisung 9 dak COVID-19 putetogo, ta Jorhat Deputy Commissioner, Roshani A Korati-i ashi.

"Parnok nisung 9 ya district balala nungi lir saka Prem Nagar nung aliba Manab Dharma Ashram nungi külemi aru. Parnok Delhi nung Rajdhani Express nung mener aru aser

Mariani railway station nung tendangdang COVID-19 aliba putet" ta Korati-isa ashi.

Jorhat district administration-i COVID-19 azüoktsü atema teinyaksü ajak inyakdar. Külen, Dibrugarh district administration-ia COVID-19 inyakyim sülen manidakertem merenshitsü atema task force ka tentetogo.

## DMC Cleanest Colony Competition 2021 atema metetdaksür

**Dimapur, Rongchii/April 20 (TYO):** Dimapur Municipal Council (DMC) kübok Better Dimapur atema "Cleanest Colony Competition 2021" nung tetendangertem April 19, 2021 nü senden ka mena April 24, 2021 nü nungi tenzüka DMC kübok aliba colony ajak sema jajatsü lemteta liasü.

Iba den külemi tetendangertemi DMC kübok colony ajak dang pei colony müreka ayutsü aser colony nung aliba sanitation committee ajunga dang nüburtem nem angatetdakja iba tetoktepba nung shilemagitsü aser mapant shia mürekmejuba mapa inyaksü ayongzüka liasü.

Senpet sen angutsü kisüing atema masü saka Dimapur tajungba kumdaksütsü mechi nüburtem tangatetba alitsüla aser arok asoshi bilemtsüla, ta ashi.

Taküm kanga sashia

tendangtsü aser telemsa ter nung amendaker tendangtsü. Itemji jana ketdangsüba, kilentzü aoba ketdangsüba, jana arongba, arok metzü meshiba tesem, aroki shilem agiba, sanitation committee inyaksangshi, arem mürekba, tobacco free zone, traffic mesüra nüburtem nem timtem/tetsükdaksü magütsü ki-o-jen yangluba aser raksaba aser RST (Residential sanitation Tax) mapang shidak nung menokbatem alitsü.

DMC kübok ward 23 lir aser yangji colony tila 73 aser tulu 22 lir.

Iba tetoktepba nung elimination round malitsü aser colony ajunga nem ita shia points agütsütsü. Colony tulu aser tila category anaprong nung mezüngbuba jenjang nguteter nem senpet sen 1,00000, tanabuba jenjang angur nem senpet sen 30,000

aser tasembuba jenjang angur nem senpet sen 20,000 agütsütsü. Maneni colony tulu aser tila anaprong nem senpet sen 10,000 agütsütsü.

Iba tetoktepba nung tetendangertem ya Nukshi Matong EAC(sardar) convenor aser Sentimeren Pongen Vice-President, Dimapur Naga Students Union (DNSU) member secretary; Vimeno Angami, Vice-President Naga Women Hoho Dimapur (NWH); Onen Jamir General secretary GBs Union Dimapur; Zasi Zakiesato General Secretary Dimapur Urban Council Chairmen Federation (DUCCF) aser Gangangpou Joint Secretary Naga Council Dimapur(NCD) alitsü. Tetendanger temi hopta shia DMC kübok aliba colony tem sendangtsü iba senden nung lemteta liasü.

## Kohima district nung COVID nungi jenbuttsü mera agitsü metetdaksür

**Dimapur, Rongchii/April 20 (TYO):** Kohima district densema India tesem ajunga nung COVID-19 cases kanga keraa timba akumba ajanga wave tanabuba arur, anungji iba tashidak nungi kumzüka alitsü meratem, talisa nüburtem aliba tesem nung mask agiba aser social distancing yimyatem ya Kohima district nung kanga metsünga-reta amshitsü, ta Deputy Commissioner, Kohima, Gregory Thejawelie NCS ajanga sangdong ka nung metetdaksü.

Kohima district kübok lokti, shisaliok, südoksenem,

sobaluba, yimten ren, tamangba yimsü tsütsü sentong ayongzüker, dokan, shishilempaba tesem, restaurants, hotels, business establishments, sorkar aser juri office, public transport ajak nung mask agitsüla, teka müreka ayutsüla aser social distancing yimya amshitsüla, ta sangdong ajanga ashi.

Containment Zone dak alaka danga tesemtemnung adenshitsu meladak tamentsü menden shilem 50 mesüra nisung 200, koba tajembar aji amshitsüla. Lokti adeshidak ajunga nung thermal screening alitsüla.

Teladak tesemtem nung nisung 200 dak tema arua adentsüsa lira, District Task Force dang jelia e-mail/WhatsApp ajanga warroomkohima@gmail.com mesüra 8413097970 nungi temelaba agitsüla, ta totuyuba nung shia lir.

Iba totuyuba nung aibelener nem sorkar lemtet nung aliba ama temerenshi alitsü.

Maneni item totuyuba sülen manidakba atema Disaster Management Act 2005, the Epidemic Disease Act, 1897 indang Section 51 aser IPC section tapet agi merenshitsu, ta sangdong ajanga ashi.

## Deputy Commissioner Kohima indang office yimya kar melenshir

**Dimapur, Rongchii/April 20 (TYO):** Tongtipang mesüra nungdak maliba nisungtem ajanga Office of the Deputy Commissioner, Kohima indang security aser office inyakyim nung timtem agütsür, ta Office of Deputy Commissioner Kohima sangdong ka ajanga ashi.

Kohima district densema linük tesem ajunga nung kanga kera COVID-19 cases tali akumba mechi tang nungi tenzüka inyaksütem kar metetdaksüogo, aser itemji:

1. Office of the Deputy Commissioner, Kohima Complex nung ketdangsür, staff aser tesemdanger

ajungai mapang ajak nung mask agitsü, nisung tsünga tawa ayutsü aser teka müreka alitsüla.

2. Handicraft, ticket, calendar, badges amala ayoktsü asoshi nisung shinga Office telungi aittsü memelatsü.

3. Deputy Commissioner, Kohima Complex telungi temelaba agüja aliba gari tem dang aittsü aser danga gari ajak Complex kima anena ayutsü.

4. Kanga rongdak nungdak aser temzüng ozüing dak sendakba ken o dak alaka Deputy Commissioner, Kohima indang Office nung

Bodhbarnü 'public interview' malitsü.

5. RTI Act indang inyakyim ajanga dang ashi, danga lenmang/yimya kecha nungia Office semdangertemi kecha file meshia amshitsü memelatsü.

6. File aser record tem junga rizünga ayutsü aser amshitsü mapa ya temelaba agüja aliba Officer/Staff/Dealing Assistant/Peon tem mapa asütsü.

Maneni item totuyuba timi inyaksü asoshi SDO(C) (Establishment) ajanga tongteprateptsü, ta sangdong ajangasa ashi.



Deputy Commissioner aser DTF Chairman, T. Wati Aier lenisüba kübok Kiphire District Task Force pur senden ka April 20, 2021 nü DC indang Conference Hall nung mena liasü. Pei mapa shidak inyaksü asoshi medical officer aser staff ajak pei mapa inyakba tesem nung alitsüla, ta Deputy Commissioner aser Chairman DTF ajanga senden nung metetdaksü

## WATSÜ MUNG DANG

### 22 BUBA INTI SENDEN SENTONG

**Anogo** : 23rd (Friday) April 2021  
**Tesem** : Town Hall, Mokokchung  
**Omen** : "Aotsür Jenmung"  
**Speaker** : Wt. Dr. I. Asongla Pongen  
 Founder, Library Cum Theological Research Consultancy, Mokokchung

#### SENTONG - I Mapang : 10:00 Ako Sentong Lenir : Mendenpur

1. Aotsür Jenmung : Wb. Changsen Pongen
2. Asür bilemtetba : Wt. Mefonaro Imchen  
Asso. Pastor (W)  
Longkhum Baptist Church
3. Watsü Anthem : Telok
4. Sarasademtsü : Wt. Shilula Imchen,  
Asso. Pastor (W) MTBA
5. Tepela O : Wb. Limawabang Jamir,  
Deputy Commissioner, Mkg
6. Tajungshi O : Tir, Ao Senden
7. Tenla meshiteta Sarasademtsü : Wt. Tiakümla Asso. Pastor (W)  
Marepkong Baptist Arogo
8. Onük : "Aotsür Jenmung"

#### SENTONG - II

1. Osangtem agiba mapang :  
1) Tongti Zülur Osang  
2) Tentet Luden Osang  
3) Auditors Osang  
4) Pangzüng Luden Osang  
5) Nungtet Luden Osang
2. O Lemtep mapang :
3. Menden melentepba Mapang : Wt. Moachila, Taoba Tir
4. Menden Tatem O :
5. Tatem Sarasadem : Wt. Wapangnaro,  
Asso. Pastor (W)  
Tzuspang Baptist Arogo

Covid-19 wara dak ajemdaker Sorkar SOP tetuyuba nung iba mungdang amongtsü. Anungji delegates kwi jaoka lir nenok ajak meratai arua iba mungdang nung atentsü metetdaksür.

## Army Recruitment atema CEE thinener

**Dimapur, Rongchii/April 20 (TYO):** COVID-19 tensa mechi Rangapahar Military Station nung April 25, 2021 nü Army Recruitment atema Common Entrance Exam (CEE) agitsü aliba thinener, ta sangdong ka ajanga metetdaksü.

CEE atema anogo tasen ya meilongi sangdongtsü. CEE

atema anogo lemtetba sülen candidate nem admit card tasen agütsütsü, ta sangdong ajanga ashi.

Iba dak sendakba nung osangtsüsang tejangjaba nung metettsü asoshi website www.joinindianarmy.nic.in nung angutsü, ta sandong ajangasa ashi.

## Mokokchungnung COVID-19 mozü agitsü anogo atsülanger

**Dimapur, Rongchii/April 20 (TYO):** Tang tashinung Mokokchung nung April 19, 2021 tashi nung Front Line Workers, Health Care Workers, arishi küm 45 aser temapur sensotem COVID-19 mozü agir ajak agi nisung 14,966 (meyirjang terpezu noklang toko roker terok) jungoko, ta Chief Medical Officer office, Mokokchung ajanga sangdong ka nung ashi.

Nüburtemi angateta COVID-19 mozü agiba ajanga April ita atema iba ajem agitsü asoshi anogo talila atsülanger, ta sangdong ajanga ashi.

19 mozü ya arishi küm 45 aser temapur sensotem nem Immunization Room, District Hospital, IMDH, Mokokchung nung hopta nung anogo pongunü -Hombbar, Mongulbar, Bodhbar, Brihostibar aser Hokolbar anogotem anepdang 10:00 ako nungi nikongdang 4:00 ako tashi agütsüdar.

Mozü agitsüpurtem ajaki registration atema photo ID ka (Aadhar, Electoral photo ID, pensioners ID, PAN Card) bener arua kuli sayua ajem ya agitsü akok, ta Chief Medical Officer, Mokokchung nungi sangdong ajangasa metetdaksüogo.

## Deputy Commissioner, Dimapur ajanga senden ayonger

**Dimapur, Rongchii/April 20 (TYO):** District Task Force for COVID-19 aser District Task Force for COVID-19 Vaccination pur senden ka Deputy Commissioner indang Conference Hall, Dimapur nung April 21, 2021 anüingdang 11:30

ako nungi amentsü, ta Deputy Commissioner, Dimapur, Rajesh Soundararajan ajanga sangdong ka nung metetdaksü.

Iba senden nung züngsem ajunga medema arua adentsü mepishia metetdaksür, ta sangdong ajanga ashi.



Assam kübok Lakhimpur district nung police-i mozü shibelener nisung ka apuba sülen agiba noksa angur. Police-i Hiranya Doley (Chatyandra Doley) ket nung heroin gram 13.43 bena lia apu. Ano tanga tatalokba ka nung police-i Pabitra Doley kinungsü Dananti Doley ket nung heroin gram 66.07 bena aliba apu. (Lakhimpur, April 20)

### Mizoram nung anogo 7 lockdown sangoktsür

**Aizawl, April 20 (Agencies):** Mizoram sorkari Aizawl den district headquarters 10 nung anogo 7 lockdown asüba osang metetdaksüogo.

Hombor aonung agütsüba sangdong nung "lockdown" ta amshia mali saka Aizawl municipal area aser tanga district headquarters nung alirtem tenokdangba mapang kidang dang amongtsüla ta shia lir.

Bangdak Village Level Task Force (VLTF) mesüra Local Level Task Force (LLTF) nungi temelaba meshir public aser inter-village movement mesüra intra-state movement melar, ta sorkari sangdong nung metetdaksüogo.

Mizoram nung Aizawl dena

district 11 lir.

LLTF mesüra VLTF-i lateta alima ama dokantem lapoktsü akok. Ajisiüaka, aonsotsü aser tanga osettem bazar nung ayoktsü memelar aser nübortem aonsotsü agi atema LLTF mesüra VLTF-i mapa inyaksüla, ta parnokisa ashi.

Anogo tenetnü shibangdang tamangba yimsü tesemtem, shisaliok rejutem, public parks, picnic spots, movie theatres, gymnasiums, community halls, restaurants, shopping complexes, malls aser amusement resorts kecha melapoktsü, ta sorkarisa metetdaksüogo.

Ajisiüaka, mapang lateta aliba ama school board tatidang aser all India level aser tanga

recruitment tatidangtem agitsü akok. Asüpila aser kiyimba sentong nung nisung 30 dak tali madenshitsü.

Mizoram nung vaccine agir dak COVID putet:

Mizoram nung Covishield vaccine agir arishi küm 41 tain tebur ka dak COVID-19 putetogo.

Tesüiba ghonda 24 tsüngda Mizoram nung nisung 91 dak COVID-19 putetba nung pa dena lir.

Iba nisung ya Delhi-i or aru. March 3 nü pai mezüing dose agi aser April 4 nü tanabuba dose agia liasü.

Yashi sample 2,038 tendangba nungi nisung 91 dak COVID-19 aliba putet aser parnok züngsema nisung ajak agi 4,995 kümogo.

### Assam nung Covid tenokdangbatem agütsür

#### Aonung 6:00 ako nung shishilembadak ajak shibangtsü

**Guwahati, April 20 (Agencies):** Assam nung Covid-19 azüoktsü atema sorkari Mongulbarnü dokan aser shishilembadak shibangtsü tetuyuba ka agütsüogo.

Assam nung aonung 6:00 ako tashi nung markets, shops aser restaurants shibangtsü ta state sorkari metetdaksü.

Hombarnü Assam nung sample 65,410 tendangdang nisung 1,367 dak COVID-19 aliba puteta liasü aser nisung 7 asü. Tang Assam nung Covid agi shiranger 6,300 den timba anepaludar.

"Pharmacy tem dak alaka

shishilembadak ajak aonung 6:00 ako tashi nung shibangtsüla" ta Assam chief secretary Jishnu Barua-i ashi.

District ketdangsurtem nungi temelaba agiba sülen ang sentongtem agitsü saka sentong nung 50% mesüra nisung 400 tashi dang adenshitsü melar, ta Assam State Disaster Management Authority-i metetdaksü.

Kiyimba sentong mesüra tanga nija sentongtem nung nisung 100 tashi dang adenshitsü aser asüpila sentong nung nisung 20 dang adentsü, ta parnokisa ashi.

Essential services dak alaka office tem nung ketdangsurtem yutsür tanüingba staff 50% dang arutsüla. Mashisa tetsürtem aser arishi küm 5 ser teküpok tanur aliba tetsütem kidang nungi dang mapa inyaksü, ta parnokisa ashi.

Shisaliok rejutemi online ajanga class agitsüla aser anogo ka nung kaketshir 50% dang school-i arutsü, ta ASDMA-isa metetdaksüogo.

Maneni, city bus, intra-district, inter-district aser interstate bus nung nisung 50% dang amentsü, ta parnokisa shisem.

### TIPRA-INPT MDC temi tezüngzüktep agiogo

**Agartala, April 19 (Agencies):** April 19, 2021 nü The Indigenous Progressive Regional Alliance (TIPRA) MOTHA aser Indigenous Nationalist Party of Twipra (INPT) MDC temi tezüngzüktep agiogo.

Agartala nung aliba ADC Bhavan nung iba sentong ayongzüka agi.

Purna Chandra Jamatia-i Chief Executive Member (CEM) inyaksü ta TIPRA tanishir Pradyot Manikya Debbarma-i osang jangjatsüogo.

TIPRA tanishir Pradyot-i anir züngsem asem agi akümba Advisory Committee ka kümtetsü aser iba ajanga ADC ketdangsubaren

reprangtsü.

Election agiba sülen ozüing alema mapa inyakba anema Bharatiya Janata Party (BJP) candidate 9 aser Independent candidate kati tezüngzüktep agiba sentong nung maden.

April 20, 2021 nü CEM aser executive züngsemtemi ADC auditorium nung tezüngzüktep agitsü.

**Piles Cure Centre** - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nung junga tanepsü mang. Ajisiüaka, tang **H. Umar Chesam contact no.7627998690 / 9362359056**  
**Address: Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsüngda ni tanepsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM -Yours sincerely - Taliyimba, Add: Mokokchung**



**NAGALAND EMRS MANAGEMENT SOCIETY**  
**A Registered Society under the Aegis of Tribal Affairs Department**  
**GOVERNMENT OF NAGALAND**  
**NOTIFICATION**  
**Dated : Kohima the 20 April 2021**  
 No.DTAN/EMRS-60/2021//In pursuance to this Office Advertisement of even number dated 30th March 2021, this is to notify all the candidates that the personal interview for Grade IV posts ie., Multi-Tasking Assistant, Security & Mali under various EMRS in the State will be held on 29th and 30th of April 2021 from 10AM onwards in the Directorate of Tribal Affairs, Kohima as per the following schedule.

ROLL No./Receipt No.	DATE
000001 to 000367	29th April 2021
000368 to 000734	30th April 2021

Candidates are required to bring all necessary personal documents in Original along with the Receipt issued by this Office.  
 Note: All Candidates are to maintain Social distancing while adhering to Covid SOPs issued by the Government of Nagaland.  
**Sd/-**  
**(I.SINO PHOM)**  
**Joint Director (HoD) & Chairman**  
**cum Ex-Officio, NEMRS**  
**Management Society**  
**Issued by DIPR**



Mongulbarnü Arunachal Pradesh Chief Minister Pema Khandu-i Khandro Dowa Zangmo hospital, Tawang nung COVID-19 vaccine dose tanabuba agidang tangokba noksa angur. (Tawang, April 20)

### Manipur sorkari tourist tesem 9 shibanger

**Imphal, April 20 (Agencies):** April 20, 2021 nungi tenzüker Manipur nung tourist spots 9 shibangtsü ta Commissioner of Art and Culture, Government of Manipur, M. Joy Singh-i metetdaksü.

Manipur nung COVID-19 kanga putetba ajanga iba tetuyuba agütsü.

Tourist tesemtemji- Indian National Army (INA) Martyr's Memorial Complex, Moirang, Manipur State Museum, Imphal, State Central Library, Imphal,

Bhagyachandra Open Air Theatre, Imphal, Maharaj Chandrakriti Auditorium, Manipur State Art Gallery, Imphal, Palace Auditorium, Imphal aser Kangla lir.

Kangla telungi inürtemi anogo tenet jelia bangdak ketdangsurtem dang nungi temelaba meshitsüla, ta sorkari metetdaksüogo.

"Ajisiüaka, Kangla telung nung public atema morning & evening walk melar" ta parnokisa ashi.

### Guwahati nung school ana shibangtsü

**Guwahati, April 19 (Agencies):** Guwahati nung kaketshirtem aser tesayurtem dak COVID-19 putetba sülen Hombarnü Kamrup Metropolitan district-i school ana shibangtsüogo.

Hombor nungi tenzüker anogo tenetnü atema Betkuchi nung aliba NPS International School aser Noonmati nung aliba Assam Jatiya Bidyalay shibangtsü tuyur ta district administration-i metetdaksü.

NPS International School nung kaketshir kar aser Assam

Jatiya Bidyalay nung tesayur kar dak COVID-19 putetba sülen iba tenokdangba agütsüogo.

Dispur revenue circle nung circle officer-i school ana shibangtsütsü mapa lezmüksü aser iba tesem nung ozüingi memelaba nisung aser garitem senzüba noktanger ta shiogo.

Joint director of health services, Kamrup Metropolitan district-i yokba teloki school anaprong nung kaketshirtem aser tesayurtem dak COVID-19 tendangtsü atema mapa lezmüksüogo.



## TIR YIMYIM YIMOBILEM (EDITORIAL)

DIMAPUR RASEMNÜ, RONGCHII (APRIL) 21, 2021

### Sen ngura ojang ta masü !

**A**senoki asenoksasa Naga nunger mesüra Aor taküm yimya aser jakla indang jembidang, tetia nümadangdanga, Naga nungerji aser talisa Aorji tongmelang, ochishir aser meranga inyakba kin aser nübortem ta jembir. Iba jenjangji kaketreju tuluka nungi doctorate anguba qualification dang nungibo kanga agia tuluba. Aji oda, alima nung shibaibo tongmelang, ochishir aser meranga inyakba nisung memeimtsü aser akümmetsübutü ? Iba denji tang asenok libaliro, temulungsentsü aser jakla yimya medemdangra, tsüraburibo tenüng tajung jatsü nung asenoki asen tenüng den mesütep aser meputep alir ama asenoki asenoksasa asadangtetsü. Asenoki asenok rongnung ochimashiba indang jembidang, jet ta yimten yimsüsürtem indang jembir ama asenoki bilemer. Ajisüaka, kodang asenok nübortemi pei alidak yimtsüng aser jila-tem nung senotsü tera ajangzüksü mechi inyakba mapatem reprangdangdir, asenok tongmelang nisung masü aser ochishia aser meranga inyakba purtema masü, saka onsara tekülak, alimelia tagitsü ait aser meranga inyakba nungi masü saka asenoka mapa meinyak ser meshitakyim agi shitakyim küma senotsü bushiba purtem kumogo ta reprangtetsü. Item kulitem rongnung tang tenük agi ngua ataloka mapa kaji, National Highway yanglutsüba lenmangtem nung kiojen raksatsüba aser agiendaksüba temenok (compensation) meshitsü asoshi aritepa ali kiburtem aikati lenmang yanglua aotsüba tesem nung kiojen yangluba mapa ya asütsü. Tang ya Nagaland nung National Highway yanglua aotsüba tesemtemji Kohima, Phek, Mokochung, Longleng aser Zunheboto disrict-tem kübok lir aser item tesemtem kar nung nisungtemi temenok meshitsü asoshi kiojen yangluyonga aoba mapaji tongmelang, ochishir aser meranga inyakba alirtem jakla aser mulungsentsü memesük repranger. Nübortem asoshi terenlok mapatem inyakbatem rongnung tongtibangtibaji gari lenmang yangluba ya lir. Nagaland state nguli aritepa inyakba mapatemji gari lenmang aser school lapokyonga aoba mapatem ya liasü. Atangji, ashiko asenok onsara tongmelangraba agi, akhidang yanglua toktsüba lenmang aser akhidang lapoka yutsüba school-tem tajungba küma anepalutsü memetet aküm südi. Aji oda, lenmang tamajung nung asüyonga asenokbo tadongtsü ka tongra temulung asür aser lenmang majungba ajanga timtem aser takoksa ajuruba indangbo tebilema mebilemdanger. Ajisüaka, kodang asenoki asen alidak tonga aruagi gari lenmang tajung yanglua akaba tajangzük indang shisadangdir, mapang tatsütiba nung senotsü ishika ka agi asen nungdak ajak ataloka inyakba tajangzük indang angatetsü. Atangji asenok aikati ajia angateta lir, ibayongji gari lenmang dang junga yanglura ta ser kiojen aser süngdonglidong raksatsüba indang temenok agir dang ashi, alibo angati agütsür. Ajisüaka, asenok rongnunga kari temenok agitsü tebilemba nung tang aritepa gari lenmang tasen tua aotsüba tesem nung kiojen yangluba mapaji parnok aser par yimertem asoshi dang masü saka alima tsüngdang Naga nunger aser Aor maksü tuluka ajurur. Yashi lenmang yanglutsü purtem arua len tuluba aser tajungba küma yanglutsü asoshi jungjunga asar ao aser tanü item tesemtem nungji aseni kimong tasen mesema ki yanglu ta süra tangari kechia ta bilemstü ? Aser asen shisatsüji koda ? Tongmelang, ochishir aser meranga inyakertemji, shitakba, parnok amaji asü masü (?) ta kanga rataa bilemstüsa asenoki inyaker. Asenoki o agibo abensaa jembitettsüa akok, saka kodang asen kija lidir aser kodang senotsü angutsüsa lenmang kar asenoki reprangtetsü, ibaji hon tendangtsü asoshi mi nung arongba mapang amato asütsü. Idangji dang asenok tongmelang, ochishir aser meranga inyaker chiyongba kin, kidong aser nisung asü masüar jangjatsü. Aji oda, asenoki asenbo ajangzüksü saka asen kinbo mesüra asen yimerbo tangar tsüngdang maksü aser tenüngmenük ajurutsü ta asüba mapatem inyaktsü kecha nungnanga mebilemra, khen anenang aser bilemdangang, kechiyong asenok ya asen kin aser asen yimer aliba agiang alir. Sen ngura ojang ta masü saka ni inyakba mapa agi ozü kin akhüm ketsütsü asü (?) ta bilema inyaktsü tim.

## OLEMSABANG

### Tiyazü ainkar anema Tsüngrem'er shin O

~ L.Kika Pongener.

Kibuba O kü dangi aru, "Nisung chir, Israel ainkartem anema shina jembiang, shirnoki pei mulungjang nungi ainkar O jembir parnok dang shiang, Yamai Kibuba Tsüngremi ashir, shirnoki kecha mungui pei shisatsü agi ainkar O jembir parnok aiatai ! Oh Israel, ne ainkartem (Tiyazü ainkar) azüngmeyakdak aliba shirongtem mesuka lir....Parnoki amajok aser tiyazü purapujiogo; Kibubai parnok meyok nung, Kibubai ashir ta jembir, aser parnok aji ataloktsü ta nisungtem nem imladaktsü. Ni mejembi nung nenokibo Kibubai ashir, ta nenoki ashiba ya nenoki anguba amajok mangdang ka aser nenoki jembiba tiyazü ain purapuji ka masü no ?" Anungji Kibuba Tsüngremi yamai ashir, "Nenoki amajok jembi aser tiyazü angu nung, ajiang ni nenok anema lir, ta Kibuba Tsüngremi ashir"(Ezekiel-13:1-8).

Lai puti meteteremi ashiba agi tejen putu aser tasen lai putu tsüngda nung kum noklang pezü shi Tsüngrem'er ainkar shin O kecha mali, alima ajunga tammang tia nung liasü. Alima nung Tsüngrem-a mali ama nuburtem kanga dang shisa-rama tia nung liasü. Atangji, Tsüngrem'er shin O ka melira tamangertem "Nukpoker lennitsü ajok" maka ama aser "Rong ka rongitsü" maliba ama asütsü. Atangji nuburtem tamang nung atsüngzuka aodang, ano Tsüngrem lartem aibelena oya-a alidang, kümdangdaksütsü asoshi ainkar shin O-ji kanga tongtipang. Ajisüaka, tesasatsü-ka Tsüngremi meyok sernung Tsüngremi yoka ta, mesura Tsüngremi mejembi sernung Tsüngremi yamai ashir ta...Pei mulungba O agi Tsüngrem'er shin O kümdaktsür, tamangertem mangmangdaksüba karbo lir. Laishiba nung Exekiel ainkar-i tiyazü ainkartem anema shinba O-tem azüngdang, par putu mapang nunga Tsüngremi shimtetba ainkartem jilo benshiba tiyazü ainkar-a liasü na ? ta sungmangseta azünger...!!! Kechi mapa nung sudir suaka mapa tajung sulenji teti tamajunga anidaker. Temeshiba mapa sulenji teti 'Temenen Mojing' mapa-a anidaker.Tanü asen putu nunga, Ezekiel ama, Isaia ama, Yerimia ama, ainkartem aika aliba ajanga Tsüngrem'er wadang nung tenzükertem aibelena/chimia oya-a alidang, Tsüngrem'er shin O agi tekümdangtsü shia kümdangdaksür, arogopurtem tamang nung atsüngzuka oya-a alidang, Tsüngrem'er shinba O agi asüngsashidaksür. Anungji tejen putu nung dang masü, tanü asen putu nunga Tsüngremi nubur asoshi balaka shimtetba shiner/mangdang aika aliba agi tamangertem kümdangdaksür aser asüngsashidaksür. Aser shirnoki Tsüngrem'er shinba O nung atapisua tashi mangar parnokjibo tenarong mesuker aser merenshir. Anungji Tsüngrem'er shinba O-tem asenoki mezüngmeshi mesui ret-reta agizüksüla aser tashi anga-a benshitsüla.

Ajisüaka, tejen putu nung ama, tanü asen putu nunga tiyazü shiner/mangdang, tangar jilo benshirtem karbo lir, itum atemaji kanga kümdangtsüla. Aji oda, itum tiyazü shiner/mangdangertemi pei bilemba aser pei mulungba agi shinba O-temji kanga shisadangtsüla/kümdangtsüla. Aor kibong ka nung jabaso ka, sorkar mapa post ka atema interview agütsür külen, ajangtsüla asü majungtsüla (?)... ta shiner/mangdang ka dangi par tsüraburji orr asüngdang. Aser shiner/mangdang jagi sarasademer külen...Oh pabo shimogo !!!...adoktsüa/takok angutsüa ta ashi, anungji kanga dang temulung lemseta, result adokba anogoji kodang atongtsü ta yongyaseta ata-a ali. Ajisüaka, tia maka kodang result-ji adok, iba jabasoji takok angur rongnung maden. Ano tebur tain ka poknung nung komo tamajung adoker kanga tim-atem, anungji X-Ray & Ultra-Sound agia repranger külen, Doctor-i teküraba nung 'Operation' agitsüla-a ta ashi. Ajiser, paji ano shiner/mangdang ka dangi orr asüngdang nung, shiner/mangdang jagi ita ka lumia sarasadem nung junga-adoktsü ta ashi, saka tasesatsü-ka ita ka lumiba sulen shirang-sangji tamajungba-ang akümba otsü lir. Ano shiner/mangdang kati, par kiyonger kibong ka temenenpur asüba agi, Tsüngremi par kidang jagi kheni maotsü nokdang...orabangla merenshitsüa ta ashir !!!... ta jembiba otsü lir. Ashiko, iba shiner/mangdang jagi laishiba azünger asü mazünger'ar meshitet, ajioda, iba shiner/mangdang jagi laishiba azüng asübo pai/lai yamajibo mejembila...!!! Kechiba sura Tsüngremi temenenpur kidangi tou tabo mashitsü sudi...!!! Mesura meshindaktsütsü sudi...!!! Yisu Khrista alimai aruba ya temenenpur bushitsü aser kümzüksü aru. Yongji pai Zakia ama alimelen sarur aser Samaria-tsürla ama, Yihuda nungeri temenen nisung ta züngshiba/züngtokba nisungtem, parnok dangi tsüngdong orr ajurua temulung meyipdaksüba laishiba nung angur. Yisui ashi, "Anema alirtem asoshi mozü shiteter tenungdaksü maka; saka shirangertem asoshi tenungdaksü....Kechiaser ni temeshipur masü, saka temenpur ajatsü aser kümzüksü aru" (Mathi-9:12-13).

Tang COVID-19 wara agi alima ajanga shirangba mapang shiner/mangdang karibo ya India nung Modi-bai aniba BJP sorkari Khristan yimsu samatsütsüba tasa atonger-a ta jembiba, ano China lima nungi 'Communist'-temi Khristan yimsu samatsütsü olulu perokba danga ta jembiba lir. Anungji 'Mask'-a magitsüla, tenla kidang tekülem sentep ya-a alitsüla, aji oda, tenla kidang tekülem sentep maliba ya Tsüngremi merenshitsü ta jembiba lir. Yim kar nungbo, nisung karibo par kidang telok ayongdena senteper tekülem sentep aliba-a lir. Elija ainkar tendak-a Siria chuba küpok tongtipur ka Naman zützüra adokba, Elisha ainkar-i pa zützüra aneptsü atema Yordan nung tenetben shitoktsü ashiba pai mamang (2 Chuba-5:1-12). Naman ama tanü tamanger aika tashitak wara nungi kümzüksü atema sorkar-i teinyaktsü tuyuba (SOP) nung tashi anga-a manitakba, iba ya Khristan tamangba anemba mapa ka danga...ta pei bilemba agi Tsüngrem'er shin O kümdaktsüba karbo lir. Asenoki itum ama shinba O-tem dak mamangli, saka iba COVID-19 tashitak wara nungi asen taküm kümzüksü atema, sorkari tang tensa den apet kechisa teinyaktsü (SOP) tetuyuba tsüzüng-ozüngtem agütsür, itum nungji nentak-nendaka tashi anga-a anidakdi. "Tashi angabaji tetepsetba tenla dang nungia ajangba" (1 Samuel-15:22).

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir**

## Underwood aser Cece Winans nati ACM Awards nung shilem agi



April 17, 2020 nü Nashville nung 56buba ACM Awards sentong nung Carrie Underwood aser osangtajung kentener, CeCe Winans nati külemi ken atenba mapang tangokba noksa nung angur. Underwood aser Cece nati "Amazing Grace," "The Old Rugged Cross," "How Great Thou Art" aser "Great Is Thy Faithfulness" medley aten.

**Nashville, April 20, 2021 (Agencies):** 16 ben tashi Academy of Country Music Award angula, Carrie Underwood-i osangtajung kentener, CeCe Winans den külemi 56buba ACM Awards sentong nung Khrista osangtajung ken aika aten; iba award sentong ya Amongnü (April 17) nü agia liasü.

Underwood aser Cece nati "Amazing Grace," "The Old Rugged Cross," "How Great Thou Art" aser "Great Is Thy Faithfulness" medley aten.

Kententsü atema Underwood nem mapang agütsüdang country kentener nungtugu, Dolly Parton-i, "Ni kü tembar tajung Carrie Underwood metetpelatsür," ta metetdaksü.

Dolly Parton-isa, "Carrie dak sempet tajung aliba agi ni la teti nukshia aru, iba denji külemi la dang temeim aket, aria bilemba

aser tangar nem tenla tajung agütsüba atema ni la pelaa repranger. Ajak dang alia künaprongla tamang nung kanga takang. Taonung lai la indang kensep tasenba, My Savior nungi osangtajung kentem ajanga lai shilem agiba ajanga tamang jenjang kuli sayur. Iba ya (kensep tasenba) lai jangraa inyakba project ka lir," ta metetdaksü.

Underwood indang kensep tasenba nungi "Great Is Thy Faithfulness" ken nung Winans-ia Underwood den külemi shilem agia liasü.

Tawa Easter Sunday nü Underwood indang My Savior concert ajanga US sen 112,000 aazükteta liasü, aser lai senji Save The Children charity nem tenla agütsü. Underwood-i tesüsabuba sayaba kensepji 2020 küm sayaba Khristmas kensep- My Gift liasü aser iba kensep nunga Khristan ken aika densema lir.

**56buba ACM award sentong nung award balala angurtem:**  
 Entertainer of the Year Award: Luke Bryan  
 Female Artist of the Year: Maren Morris  
 Male Artist of the Year: Thomas Rhett  
 Duo of the Year: Dan + Shay  
 Group of the Year: Old Dominion  
 New Female Artist of the Year: Gabby Barrett  
 New Male Artist of the Year: Jimmie Allen  
 Album of the Year: "Starting Over" (Chris Stapleton)  
 Single of the Year: "I Hope You're Happy Now" (Carly Pearce & Lee Brice)  
 Song of the Year: "The Bones" (Maren Morris)  
 Video of the Year: "Worldwide Beautiful" (Kane Brown)  
 Music Event of the Year: "I Hope You're Happy Now" (Carly Pearce & Lee Brice)

## Madhya Pradesh nung Pastor Damor aser kinüngtsü na jail nung puok

**Washington D.C, April 20 (Agencies):** India nung pastor ka aser pa kinüngtsü nati ashikülak ajanga nisung aika Khristan yimsü dangi meyipdaksür, ta tai tonglokja jail nung puok, ta International Christian Concern (ICC)-i metetdaksü

Easter Sunday nü (April 4) Hindu yimsü alia amangertemi Madhya Pradesh nung anti-conversion ozüng tasenba kübok pastor aser kinüngtsü na nem tai tongloktsüba sülen tena apu.

April 4, 2021 nü Madhya Pradesh kübok Rangvasa yimdak Pastor Manu Damor aser pa kinüngtsü, Asha Damor na leniba nung Easter tekülem sentong agiba mapang nung Hindu yimsü alia amangertem nisung 50 shi arua parnok nem timtem agütsü. Parnoki kishi kakpoka aitba sülen Khristantem dak züka liasü.

Iba tatalokba sülen Pastor Damor aser pa kinüngtsü na police station-i anir ao aser tenati Madhya Pradesh

Freedom of Religion Act ozüng alema inyakogo, ta tena nem tai tonglokja liasü. District court-i pastor kinüngtsübo bail nung chiokogo saka Pastor Damor nembo bail magütsü tang tashi jail nung lir.

"Madhya Pradesh tesem aika nung Khristantem anema inyakba ken o aika angadanga mapang nung Khristantemi kangashia tamangba yimsü meyipdaksür ta tai tongloktsüba ICC-i jangjaogo," ta ICC Regional Manager, William Stark-i metetdaksü.

"Iba amai dang ora Khristantem amokmerentsü aser tekülem kitem shibangtsütsü atema Hindu nationalists nem tashi tulu agütsütsü," ta pai ashi.

Tang ICC-i ketdangsüa www.persecution.org nung online petition ka ajanga India Ato kilonser, Minister Modi dang India nung Madhya Pradesh densema state 9 nung Khristantem anema benokba ozüngtem agienang, ta

takhangba agütsüdar.

"India nung Khristantem küm 2,000 jungnüa alir, ajisüaka tawa India nung Khristantem bendanga züngshir aser reshikangshir," ta International Christian Concern (ICC) nung Tir, Jeff King-i metetdaksü.

Paisa, "ICC indang petition ajanga onoki Modi dang nisung bendanga züngshiba ozüngtem agientsü atema inyakang ta akhanger," ta metetdaksü.

Taküm March ita nung Madhya Pradesh nung agizükba anti-conversion ozüng tasenba anema pastor tem aser Khristan lenirtemi ola adokdar.

Pastor Basu-i, "State nung pastor tem aser Khristantemi timtem taliba ajangshidar. Sorkari

anti-conversion ozüng agizükba sülen Khristantem anema kanga inyaker. Iba ozüng amshia Hindu yimsü alia amangertemi onok amokmerener, saka item ama tatalokbaji junga bushisüngdang masür," ta metetdaksü.

## ANOGO ABEN TSÜNGREM DEN

### Tsüngremi yongyar

"Saka tebui par kilirtem dang ashi, sü tajungtiba yakta bener arung, aser aji pa nem sobujang... aser tetsüng nung tsüngsem semokjang."

Luk 15:22

Tematokba jabaso otsüji kodang reprangdir kanga temeim sayutettsü mapabo jabaso-i meinyak. Pei angutsü senmang ajak meshizüker-ang ki toktsür aoba jabaso ka. Tanaben angutsü shilem kecha maliasü. Saka kodang tebu kidangang alitsü tajungba ta angateta arua jabaso-i tebu dangi kasa jenjang nung masü saka kelir ka dang südi ta shilang. Tebu shibai anogoshia yongya-a liasü, pai tesüiba dang nungi tajungba sü tajungtiba bener arutsü ashi, aser tsüngsem semoktsütsü ashi. Tanü asen taküm nung Kibuba nungi pila-a jajaya lira, rata-a melili. Pai na aser ni arutsü yongya teti atar.

Meshitetba aibelen aser temenen agi na menena lira, Kibubai itemji shitoktsütsü yongyar. Temenen jenti aliba Yisu senti züh agi alangzükba sempet rongnung tajungtiba asen nem agüja lir. Shirnoki agitsü mulunger.

**Sarasadem**

Temenen lar O Kibuba nai ni shitokjangma. Amen

## Arogoi US Tir dang linük nung refugees timba agizüktsü mepishir

**April 20, 2021:** US nung Catholic Arogoi US Tir, Joe Biden dang refugee tem timba agizüktsü atema mepishiogo; Catholic dang masü saka Protestant lenirtemia kasa takhangba agütsür.

Refugee tem agizüktsü atema telatetba ayuba asoshi Biden dang mepelai putir, Mario Dorsonville-i, "Asenoki agizüktsü aliba refugees ji taküm tajemba lir, linük kati inyaktettsüsa liaka ibajibo kanga ajemer," ta metetdaksü.

Taküm linük nung refugees 15,000 dang agizüktsü lemteta lir, ajisüaka Joe Biden administration-i kobi melii iba dang nungjagi timba agizüktsü, ta shiogo.

Putirisa, Tir Joe Biden-i Amongnü shia tekülem kidangi arur, saka refugees agizükba dak sendakba nung tang tashi nungbo Arogo mepelatsüsa pai inyakogo," ta ashi.

US Tir election atema nüboyimba mapang nungbo Biden-i bendangertem aika arudaktsütsü aser refugee resettlement program asentenshitsü, ta nangzuka liasü.

White House nung tesüiba küm 50 tsüngda tang mezüng Catholic nungi Tir, Biden-i 2021 küm refugees 125,000 agizüktsü ta sangdonga liasü, saka tesülenbo 15,000 dang agizüktsü ta sangdong. 1980 küm nungbo US-i refugees 200,000 dak tema agizükba liasü.

Hombarnü US Conference on Catholic Bishops' Committee

on Migration nung tongti, Mario Dorsonville-i sangdong ka ajanga, "Alima nung kanga tia tamajung nung alirtem linüki tuluka yaritettsü koka lir. Asenoki agizüktsü aliba refugees ji taküm tajemba lir, linük kati inyaktettsüsa liaka ibajibo kanga ajemer," ta metetdakja liasü.

US-i arur refugees tem nungdak balala atema US sorkar den yaritepa inyakba melungtet telok 9 lir, aser item telok rongnung US Conference of Catholic Bishops' Migration & Refugee Services telok-a densema lir.

Evangelical Khristan telok-World Relief nung Tir, Scott Arbeiter-ia iba osang angashia aoksar aser jashir, ta metetdaksü. "Tir Trump-i refugee kanga ajema agizükba liasü. Tir Biden-ia refugees atema inyaktsü nangzuka liasü saka tangbo pai ashioksür," ta ashi.

US sorkar inyakyim anema Arogo lenirtemi ola adokba angashiba sülen White House-i sangdong ka ajanga, refugee policy ji teti atema masü saka taruba hopta tem melenshia osang tasen sangdongtsü, ta metetdaksüogo.

Tawa osangbener den jembidang Catholic telok- Hope Border Institute nung executive director, Dylan Corbett-i, "Arrotsülen Biden-i meimchir temeim mapa tuluba inyaktsü, ta onoki imlaa liasü, ajisüaka bilemba ama matalok," ta metetdakja liasü.

**OLONG PAITEP # 5788**

1		2		3		4	5			
				6						7
		8								
9				10		11				
			12						13	
						14				
16						17				

<b>TIPILEN</b> 1. Nisung jenti - (5) 4. Tsük rudenba - (5) 6. Temzüng tesashi - (5) 8. S _ _ i - (3) 9. Nisung rongnung telemsa - (3) 10. Anogoshi - (4) 12. Ajanga aor - (4) 13. Tsük rizüngdak - (3) 14. Tebang nungi adokba - (3) 16. Süngdong tatembangtiba - (5) 17. Mepupet - (5)	<b>LANGTSÜNGLEN</b> 1. Tenük telong - (9) 2. Committee dang ajar - (5) 3. Yagi ki okdoker - (7) 5. Yim lenmang - (5) 7. Temoatsü keter meyipa aruba - (9) 11. Kanga junga menemba - (7) 12. Kenyongi majinü - (5) 13. Rong kanga tulu - (5)
--	---

**OLONG PAITEP # 5787 TELANGZÜBA**

<b>TIPILEN :</b> 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.	<b>LANGTSÜNGLEN :</b> 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.
--	--

**TEBU-TEDI ALOKBAI LANGRA-RA SARASADEM**

**Pastor** : Tanü sentep nung temoatsü meshia sarasademtsü Ex-Deacon... Ex-Mission Kibur...Ex-Chairman...Ex-Gaon Bura...Tebu-tedi Alokba dang sabangi arur sarasademtsü asüngdangder.

**Alokba** : Alokba-i Eden-tsüki nung Tsüngremi Adam o Eve na yangluba... Anung-ali...Tzüyim...ita-anu...süngdonglidong...shiruru tapu ajak yangluba nungi tenzüker...Yisu alimai arur sayatenya mapa inyakba...nukpoker-tsüngtsüker-narongjaker aneptsüba..... Aser Yisu kodaki atuba.... Oda Jungkai adok tashi tatalokba ajak shia sarasadem...Aser idangji ghonda ka tera mejungi agi....Ajisuaka, tesasatsü-ka pai tanü sentep nung temoatsü meshitsübo ama-adok. Alokba A-M-E-N ta ashidangbo nisung ajak amuo-aodoker liasü.

**Arogopur** : Hai Pastor-ba....Tambur pojnin rogo arishi küm 80-90 yabo shisa rama-a akümer ako...anungji parnok anisungzüka tokjangma.

Lilir : L.Kika Pongener.

**TANÜBO NAI LANGZÜANG**

Q. Koba küm Artemis III tenzüksü?  
A.2024      B.2023      C.2022      D.2021  
\_\_\_\_\_ (Taruba adok nung onoki langzüsü)  
**YASHI ADOK TELANGZÜBA** : Endangered

**AO OSHI ANGAZÜKDAK:**

TANÜ ANGAZÜKTSÜBA OJANG

**Bentsü**  
(n) alu yimer toktsüba lu ( abandoned cultivation feild)  
\* Onoki **bentsü** nung aonsutsü aika bendentet.

**Bentsü**  
(v) tanur anepaluba ( nurturing child)  
\* Kütsüi onok den kiyonger tanur dena **bentsü**.




Tir Yimyim


**NAI-A YA METETTER MA?**

SHIRURU TILA (INSECTS) ACHIBA NARODONG KAR:

- Cobra Lily (*Darlingtonia californica*)
- Purple Pitcher Plant (*Sarracenia purpurea*)
- Yellow Pitcher Plant (*Sarracenia flava*)
- White Trumpet Pitcher Plant (*Sarracenia leucophylla*)
- Tropical Pitcher Plant (*Nepenthes spp.*)
- Sun Pitcher Plant (*Heliamphora spp.*)
- Western Australian Pitcher Plant (*Cephalotus follicularis*)
- Sundew (*Drosera spp.*)
- Venus Flytrap (*Dionaea muscipula*)
- Bladderworts (*Utricularia spp.*)



Bladderworts (*Utricularia spp.*)



Cobra Lily (*Darlingtonia californica*)

**SUDOKU # 5831**

	9	4		5	7			
2							3	
		7			2			
	6		8	2	3	5	7	1
	7	3	5	9	1	2		6
	2	5	4			3		9
9		1		3		4	6	7
	4	2			5		1	
3	8	6						

**TELANGZUBA # 5830**

	3	2	5	9	4	7	1	6	8
4	6	1	8	2	5	7	9	3	
7	8	9	3	1	6	4	2	5	
5	3	6	7	8	1	9	4	2	
1	9	8	4	6	2	3	5	7	
2	4	7	5	9	3	6	8	1	
6	7	2	1	5	4	8	3	9	
8	1	4	2	3	9	5	7	6	
9	5	3	6	7	8	2	1	4	

**OJANG LUTEP # 5375**

- LOTEK :
- NGNU :
- ATSSHISÜ :
- UNTAJG :
- ÜJAGA :
- MBIDJEANG :
- TETMEMEI :
- BOKAR :
- MULUNTEG :
- ADOYIRUKER :

**OJANG LUTEP TELANGZÜBA # 5374**

TARUTSÜ MAPANGA INYAKTETSÜ ASOSHI KÜMDANGA  
ASALENTONG RENEMER INYAK TENZÜKTSÜ TONGTIBANG

**TAN HOPTA ATEMA - KOMA SÜLA ?**

Q. Covid-19 wara nokdangtsü atema yaküm 2020 küm ama, ita junga lockdown asünunga koma süla ?



Linük ajunga nung COVID-19 tashidak kanga kara prokshia aoba mapang ka nung Ghaziabad kübok Hindon ayongküm nung tasümangtem arongtsü atema atatepba noksa nung angur. Covid-19 tashidak agi asür aika akümba ajanga tasümang arongtsü atema mapang talangba atateper.

### Mamata-i tazüokba makai vaccine yokdaksüba atema PM Modi aitsü

**Bhagawangola, Rongchii/ April 20 (Agencies):** West Bengal chief minister Mamata Banerjee-i Mongolbarnü, Ato Kilonser Narendra Modi-i bendangleni vaccine yokba ajanga India nung stock ajema akümba sülen, tazüokba ka makai shishilembadak coronavirus vaccines ayoktsü atema temelaba agütsüogo, ta ashi.

Election atema nüboyimba sentong ka nung o jembiba mapang Trinamool Congress lenir-i, Ato Kilonser-i pa meraket atema tanga linüki vaccine yokogo, saka Maharashtra, Delhi, Rajasthan aser West Bengal amala state tem nung Covid wara den raratsü atema tenüngdakba vaccine agi anünger, ta ashi.

"Yashi PM-i mozü shishilembadak angutsü ta shiogo. Shishilembadak kong lir; mozü kong lir? Nai mozü

timbaka bendangleni yokogo," ta lai ashi.

Centre sorkari kidanger linük densema linük aika nem Covid vaccines sempet agütsüogo aser Brazil aser South Africa densema linük aika dangi mozü yoktsü atema taküm küm tetenzüklen temelaba agütsüogo.

Narendra Modi-i aniba NDA sorkar ya tetemsü masü ta shia Banerjee-i, "sentong tapet meyagluba ajanga asenok vaccine agi anünger," ta ashi.

TMC lenir-i ashiba agi, Kolkata, North 24 Parganas aser Asansol belt nung covid tashidak nisung aika dak potetdar aser state sorkari mozü ishika aliba amshia tensa aziüoktsü merangdar.

"Ita trok tashi Centre sorkari sentong yanglutsü atema kecha süoki ia magi; parnok Bengal nung election atema mazüngi

tasa asaa liasü," ta Banerjee-i ashi.

BJP aija lai, par party-i election nüboyimba nung teyari agütsütsü atema tanga state nungi nisung lakh aika anir aru aser item nisungtem ya aika dak Covid tashidak keta liasü. Item nisungtem oadoktsü saka parnoki mesen prokshitsüogo aser tang tashidak menartem yabo onok anepalutsüsa akümstsü. Bengal nung covid tensa junga aziüoker liasü saka tang kanga mejungi küma odar, ta lai ashi.

Ajisüaka lai nüburtem dang shisamebulutsü shiogo, aser parnoki wara aziüoktetsü ta ashi.

Kasa mapang nung Murshidabad nung menden atema election May 13 nü agitsü osang angazükogo, ta lai ashiba den May 13 nü Eid mungra EC-i anogo melenshitsüla ta ashi.

### Rajnath-i armed force dang civil administration yaritsü ajungshi

**New Delhi, Rongchii/April 20 (Agencies):** India nung coronavirus tashidak nisung aika dak potetyonga aoba mapang defence minister Rajnath Singh-i, Army dang wara aziüoktsü atema state administration tem nem teyari agütsütsü shiogo, kong Covid-19 agi shirangertem anepalutsü atema tesem talila mesemtetba nung teyari agütsütsü densema lir.

Army Chief Gen MM Naravane aser Singh na sensak asema sülen Army-i civil administration tem nem teyari balala agütsüba dak alia civilian tem nem parnok indang medical facility tem nung teyari agütsütsü telemtetba agiogo, ta source kati ashi.

Singh-i, Gen MM Naravane dang state balala nung Army unit temi state administrations

tenüngdakba angatetsü atema tongtepratepa alitsü ashi.

Iba sülen state nung tenüngdakbatem angatetsü aser akokba tesem ajak nung civilian tem temang anepalutsütsüba densema inyakimtem tejakleni bener aotsü atema state nung Army officer rongnung tejentibai chief minister den sendaktepa inyaksü telemtetba agiogo.

(Maneni tapak 9 nung...)



Madhya Pradesh kübok yimti balala nung lemshitsü atema Bengaluru nungi Remdesivir injections 15,000 Indore tonga bener aruba noksa nung angur.

### Rahul aser Jitendra dak Covid-19 tashidak potet

**New Delhi, Rongchii/April 20 (Agencies):** Congress lenir Rahul Gandhi-i Mongolbarnü pa dak COVID-19 tashidak potetba metetdaksüogo. "Tashidak keta aliba temaitsü terara sayuba sülen kü dak COVID tashidak potetogo," ta arishi küm 50 tain lenir-i tweet asü. "Tawa kü den ajuruteper alirtem ajak dang yimlibilema tetuyuba sülen anidaksü mepeshir aser kümzüka liang," ta pai zülutsü.

Ato Kilonser Narendra Modi densema lenirtem aikati pa takaratiba nung aneptsü imlaja ataba lemsatepogo. "Lok Sabha MP Shri Rahul Gandhi takaraba nung aneptsü aser temang anema alitsü atema sarasademtsür," ta Modi-i ashi.

Delhi Chief Minister aser Aam Aadmi Party (AAP) lenir Arvind Kejriwal-ia, pa takaratiba nung aneptsü atema sarasademja ataba lemsatepogo. "Na takaratiba nung aneptsü aser anema alitsü atema sarasademtsür," ta Kejriwal-i zülutsü.

Rashtriya Janata Party

(RJD) lenir Tej Pratap Yadav-i, pa takaratiba nung aneptsü imlaja ataba lemsatepogo.

Taoba Ato Kilonser Manmohan Singh aser Rajya Sabha MP Anand Sharma na densema Congress lenir aika dak COVID-19 tashidak potetogo. Singh tang Delhi nung AIIMS mozüki nung temang anepaludar.

Kasa mapang nung Sharma, Gurgaon nung private mozüki kati belenerogo, ta source kati Mongolbarnü ashi. Arishi küm 68 tain Sharma, shiba yasung Apollo Hospital, Delhi-i anir ao pa dak Mongolbarnü COVID-19 tashidak potet aser pa tang Medanta mozüki belenerogo, ta pa den sendaka aliba source kati ashi.

Kasa mapang nung Union minister Jitendra Singh-ia Mongolbarnü pa dak COVID-19 tashidak potetba metetdaksüogo. "Tanü kü dak #COVID tashidak potetogo aser tashidak keta aliba temaitsü sayudar. Tawa na kü den ajuruteper lira yimlibilema tashidak tendangang," ta pai tweet asü.



Delhi sorkari yimti ajunga anogo 6 mokdanga ayutsü telemtetba agiba sülen tanga state nungi mapa inyaki arurtem pei kidangi meyipa aotsü atema Kaushambi Bus Terminal, Ghaziabad nung renemtepba noksa nung angur.

### Chhattisgarh nung Maoist commander ka tepset

**New Delhi, Rongchii/April 20 (Agencies):** Chhattisgarh kübok Dantewada tesem nung security forces aser Maoist na tsüngda ghonda pongushi khatepba sülen Maoist commander ka khasetogo. Iba commander atema sempet sen lakh 5 agütsütsü nangzüker liasü.

Dantewada police superintendent Abhishek Pallava-i, commander Kosa Handa ya Maoist nung züngoksemer küm 15 jungogo aser pa Malangir area committee züngsem aser military intelligence in charge liasü, ta ashi. "Pa anema ken o 15 dak tema benoker liasü. 9 mm pistol ka, country-made gun ka, IED [improvised explosive device] seret asem, mozü aser anogoshia amshiba osettem khatepba tesem nungi ngutetogo," ta Abhishek-i ashi.

Sukma district nung Maoists temi arishi küm 15 asangur chanu ka densema nisung ana pur ao tepsetba sülen anogo ishika lir Handa tepsetogo. Maoist temi tepsetba nisung ana anasa, tenaya police nem osang agütsürtem ta zülutsür liasü.

Sukma police superintendent

K L Dhruv-i ashiba agi, Maoists temi nisung ana ya pei kidang nungi anizüker arem kati anir ao. "Hombarnü tasümang ana ya arema ka nung nguteta liasü. Tang iba arem ajunga meita odar," ta Dhruv-i ashi.

Kasa mapang nung ano police officer tangakati, tasümang anasa Maoist indang pamphlet ka ngutetogo kong tena ya police nem osang agütsür aser ibayongji merenshi, ta zülur liasü, ta ashi.

Asür anarongnung adianu ka küm ka tejakdang Central Reserve Police Force (CRPF) nung aden aser ano ka indang tebu assistant police constable aliba taoba küm mapa toktsü, kechiyong Maoists temi pa amokmerena liasü, ta ketdangsürisa ashi.

Chhattisgarh kübok Bastar tesem nung April 3 nü Maoists tem den khatepba mapang police aser paramilitary personnel 22 tepsetba den aika yiruba sülen nisung ana ya pur or tepset. Bijapur-Sukma arrtsü nung Maoists temi mendanga adar sepaitem ya tepset.

April 3 nü khatepba sülen pur aoba CRPF commando ka anogo ishika lir chiokogo.



Cape Town, South Africa nung aliba Table Mountain tekolak nung South Africa mitkar indang helicopter kati tzu ainba mapang tangokba noksa nung angur. Mibener temi Table Mountain nung Mongulbarnü agi anogo asemnü buba morok mi ya remseptsü meranger, koba kum aika tsungta morok mi tamajungtiba ka alitsü, ta zungshir.

## US sorkari lisopur dang India mesem dangtsü ajungshi

**Washington, Rongchii/April 20 (Agencies):** India nung Covid-19 tashidak kanga kara prokshia aoba mapang ka nung United States-i lisopurtem dang India-i takok tashi maotsü tetuyuba agütsüogo. "Vaccine tembanga agir alirtema tashidak menatsü ana nung lir anungji India-i takok tashi maotsü merangang. Na India-i aotsüsa kumra vaccine tembanga agirang oang," ta Centers for Disease Control and Prevention (CDC)-i ashi.

US state department-i, alima linük shilem 80 mesem dangtsü asoshi tetuyuba agütsütsü ta

ashiba sülen anogo ka lir tang iba tetuyuba agütsüogo. Department-isa, America nungetem dang linük balala semdangi maotsü tsungda senzusenpongtsü atema sentongtem kanga junga asadangtsü metetdaksüogo, kechiyong linük aika nung tashidak poktetshir lir. "Covid-19 wara ya senzusenpongterem atema kanga lendong lir. Item lendongtem asadangser Department of State-i US nungertem dang bendangleni aotsü sentong aliba asadangshitsü tuyur," ta kasa

sangdong ajanga metetdaksü.

Ajisüaka department-i, koba linüksa kechi jenjangi yoktsü iba indang osang tejangja agüja mali. Taruba hoptatem nung linük ajak indang tetuyuba balala agütsüba sülen iba ya jangjatsü.

August ita nungi tang tashi nung United States-i bendanglen senzusenpongtsü atema kecha tetuyuba agüja mali. State department-i Covid-19 menatapa aoba jenjang aser testing aser treatment agütsü asoshi peria ali mali, item ajak asadanger linük balala semdangtsü atema tetuyuba agütsütsü.

## Pakistan sorkari French Ambassador meintoktsü atema jembir

**Islamabad, Rongchii/Arpil 20 (Agencies):** Tehreek-e-Labiak-Pakistan ya kiralongrar teloka ta sangdongba den linük nung parnok inyakyim ajak tenokdangba agütsüba sülen anogo ishika lir Imran Khan-i aniba PTI sorkari linük nungi French Ambassador agientsü atema National Assembly nung resolution ka benoktsü mulunga agizükogo.

Pakistani Interior Minister Sheikh Rashid-i Mongolbarnü, sorkari iba resolution benoktsü atema TLP den hai haora kaogo, ta ashi.

"Pakistan sorkar aser TLP na mapang talangka sensak asema sülen Pakistan sorkari French Ambassador (Pakistan nungi) meintoktsü atema National Assembly nung resolution ka benoktsü telemetba agiogo," ta Rashid-i ashi.

Rashid-isa, sorkari TLP lenirtem anema ken o benoka aliba ajak agintsü aser Pakistan ajunga nung longkak aitba mapang pua alirtem ajak chioktsü atema mulunga agizükba sülen TLP-i longkak ait anentsü atema mulunga agizükogo, ta ashi.

Sorkar den sensaksem mezüngbuba shilem tembanga

sülen TLP-i parnok pua aliba police 11 chiok.

"Ken o ajak agintsü aser pua alirtem ajak chioktsü," ta pai ashiba den tarutsü nunga telok ana tsungda maneni sensak asemtsü, ta ashi.

April 14 nü Rashid-i, Anti-Terrorism act 1997 rule 11B Tehreek nung ajemdaker TLP nem tenokdangba agütsüba sangdonga liasü aser iba sülen Tehreek-e-Taliban-e-Pakistan densema tenokdangba agütsür aliba kiralongrar teloktemi yinjak nung TLP pusem tenzük.

Sorkari French Ambassador meimentoktetba anema TLP-i linük ajunga nung longkak aittsü ayongzükba sülen Pakista nung taoba hopta ka tashi tesem aika nung azütokshiba ajangshiogo aser nisung aika yiruba den taküma samaogo.

TLP züngsemtemi police ketdangtsür tejentem aika aser Pakistan Ranger tem Multan aser Lahore nung pua ayu.

TLP ya fundamentalist Islamist telok ka lir, koba Khadim Hussain Rizvi-i tentet. France tir Emmanuel Macron-i Islam dak sendakba nung tashishitsü aketba o jembiba sülen parnok tawa Pakistan nungi French Ambassador meintoktsü khanga arudar.

## Chad Tir Idriss Deby tongpang nung tepset

**N'Djamena, Rongchii/April 20 (Agencies):** Chad Tir Idriss Deby, shibai kum 30 dak tema linük nung yimsü asü aser Africa nung Islamist telungpur den raraba nung anüolen linüktem asoshi tembar tongpang ka liasü, pa linük north tsütsü sorkar anemer den raraba mapang tepset.

Mitkar lenirtem tentetba council ka ajanga Deby'er jabaso Mahamat Kaka ya khen asoshi tir inyaka atatsü shimteto, ta odongtar Azem Bermendao Agouna-i state television sangdong ka nung ashi.

Arishi kum 68 tain Deby ya 1990 kum sorkar anema apusoba mapang lenir akum aser pa ya Africa nung yimsüsür talangtiba liasü, shiba mitkar tashi amshia aser nüburtemi aiben atsüngdoktsü meranga liasü.

Pa tir menden nung kümsük trokbuba amentsü asoshi tir election nung takok nguogo ta sangdonger anogo ka lir pa asüba osang ya angazüker. Pai yimsüsüba asoshi mapang talangka nungi ashishia arur opposition timbai iba election nung shilem magi.

Linük north tsütsü Libya den arrtsülen amenoka aliba sorkar anema nokdaker temi linük yimtiba N'Djamena leni kilometer aika atsünga aruba sülen Deby-i Hombarnü yakbang nung aliba sepaitem semdanga liasü, shibai mapang

shia sepaitem den külemi tongpang nung nokdaka aru.

"Marshal Idriss Deby Itno-i teti inyakba ama, linük lendong nung alidang Libya nungi kiralongrar anema operation agiba mapang yakbang sür nokdak. Pa iba tongpang nung yiru aser N'Djamena-i bener aoba sülen asü," ta Bermendao-i ashi.

Sorkar aser National Assembly anenogo aser linük ajunga nung aonung 6:00 ako nungi anepdang 5:00 ako tashi curfew benoka lir.

"Linük nung tesunep, security aser republican order lidaktsütsü asoshi mera ajak agiogo ta Chad nüburtem dang National Council of Transition ajanga ashir," ta Bermendao-i ashi.

2018 kum Deby-i constitution tasen ka yanglutsü asoshi merang, koba agi pa 2033 tashi yimsü asütsü tashi agütsütsü liasü.

Pai taoba kum Marshal nungja agi aser taoba hopta election agitsü lia, "Ni akoktsü ta ni jelia meteta lir, aser yamaji tesüba kum 30 tashi yamaji kokyonga aru," ta shia liasü.

Chad indang totzü nungi anguba rongsen ketdangsuba aser pa anemertem ajemreptsü merangba asoshi nüburtemi pa dak temolung masü ola adoka liasü.

Saka Hombarnü sangdongba election osang nung Deby-i vote shilem 79 nguteta office nung

kümsük trok buba amentsü tashi agütsü. Opposition lenir aikati iba election nung shilem magi.

Lake Chad Basin nung Boko Haram aser Sahel nung al-Qaeda aser Islamic State tem den sendaktepa aliba teloktem densema Islamist anema raraba nung anüolen linüktemi Deby ya tembar tajung ka ama züngshia liasü.

Pa asüba ya taoba mapang iba linük nung yimsü süa aliba linük, France asoshi takoksa tulu lir, shirnoki Sahel nung kiralongrar anema raratsü asoshi Chad yimtiba, N'Djamena nung amenoka lir. Sepai 1,200 yokba ajanga iba

tesem nung France sepai 5,100 ajungtsü, ta Chad-i February ita sangdonga liasü.

Sorkar anema telok, Front for Change and Concord in Chad (FACT) ya linük north tsütsü Libya den arrtsü nung amenoka lir, aser parnok election anogo arrtsü nung tanüker alidak amak aser south tsütsü kilometer noklang aika atsünga arua liasü.

Saka Chad sepaitemi N'Djamena nungi kilometer 300 shi oa item telok aridokba sayutetogo.


Telungpurtemi Honibarnü takoksa ajuru saka Deobar aser Hombarnü parnok maneni rarar,

ta Hombarnü sangdonga liasü.

Chad nung civil war adoker mapang aruba mapang Deby ya 1970s nung mitkar nung oa aden.

Pa France nung mitkar training agi aser Chad-i 1978 kum meyipa shilanga Tir Hissene Habre busema nokdak aser sepai nung tekolakba kuma liasü.

Pai sorkar anema nokdakba mitkar telok ka anir kidanger linük, Sudan nungi hopta asem tashi Habre laodaktsütsü meranga rara, shibai yimten yimsüsür meyrirjang ter dak tema tepsettsü ajungmeso, ta aija liasü.



Shibangtsür aliba Islamist party, Tehreek-e-Labiak Pakistan busemertemi Lahore, Pakistan nung par party lenir Saad Rizvi apuba anema Mongulbarnü longkak aitba mapang tangokba noksa ka yangi angur.



## FPO-i board of directors indang team tasen shimogo

**Zunheboto, Rongchii/April 20, 2021 (TYO):** Hombarnü (19.04.2021) DAO conference hall, Zunheboto nung Farmers Producers Organization (FPO)-i board of directors indang team tasen ka shimogo, ta sangdong ka ajanga metetdaksü.

Iba team nung L Holuto Ayemi mendenbuba ama shimogo. Tanga ketdangpur rongnung Aheto Sumi (Vice Chairman), Gideon S Yeptho (Secretary), Finance Committee nung Treasurer ama Kughavi Yeptho den züngsem ana Vihuto, Lashika T Sumi aser Shitokhu Achumi dena lir.

Marketing committee züngsem ama H Hokuto Sema, Hekato Yeptho aser Y Husukha Sema, Nivili Chella, Helena, H Vitoyi, Kahoto Achumi aser Hukavi Shohe nung shimogo.

Iba sentong nung, DAO Zunheboto, Hukhato Sema-i, FPO tenzükba indang tongmelang agi telok dang rasa ashi aser iba ya centre ajanga teyari agütsüba scheme ka lir ta

metetdaksü.

Pai ashiba agi, MOVCD ya mozü mamshi tsünüsönbongtsü yokba scheme (organic farming scheme) ka lir aser North East state tem nung rangloker inyaksü, kechiyong item state ya ali temo aliba tesem lir.

Aluyimertemi mozü mamshi süngolemba aser süngjanglijang tem timba tsünüsönbongba den ang pei tsünütetbatem state telungtet nung dang masü, saka tangalen yoktetsü asoshi nükjindong yur iba scheme inyaker. Itemji asadanga aluyimer aser talirtem tsüingda FPO ajanga tesendaktep yanglutsü, ta pai shisem.

Hukhato-isa FPO indang board of directors indang team tasen dang pelaba metetdaksü aser aluyimer den nübun ajunga ajangzüksü asoshi parnoki nendaka inyaksü teimla tulu lemsatepa liasü.

Chairman L Holuto Ayemi-i, northeast tesemtem atema Ministry of Agriculture & Farmer's welfare

ajanga "Mission Organic Value Chain Development" (MOVCD) ta nüngja agütsür central sector scheme ka tenzüksüogo, ta metetdaksü.

Tanü tashi nung, iba tentet kübok telok 14 nungi aluyimer 1,100 tashi tenüing agütsüogo aser co-operative society nung FPO register süogo. Iba ya ajanga aluyimertem kija mesüra telok nem akok tashi teyari agütsüsü sentong lir, ta pai ashi.

Kasa sentong nung Agriculture Inspector, K Kikato Zhimomi-ia jembia liasü.

Linük nung nübuntemi non-organic product balala achiba ajanga temang nung timtem agütsüba asadanga item inyakyim melentsütsü nükjindong nung iba scheme tenzüksür aser iba maparen koktetsü asoshi MOVCD dak tashi lir, ta Kikato-i ashi.

Iba sentong nung Secretary FPO, Gideon Yeptho menden liasü aser Treasurer FPO, Kughavi Yeptho-i tepela anküp o jemi, ta sangdong ajanga metetdaksü.

## Noklak District Task Force senden agiogo

**Noklak, Rongchii/April 20, 2021 (TYO):** Mongolbarnü (20.04.2021) DC Conference Hall kübok COVID-19 dak sendakba nung Noklak District Task Force senden menogo, ta sangdong ka ajanga metetdaksü

Iba senden nung, Deputy Commissioner Noklak, Reny Wilfred, IAS-i, India nung Covid-19 wara tanaben adoka tensa mejungi küma aoba indang telok dang metetdakja liasü.

Nübun tsüingda novel coronavirus wara prokba aziüoktsü asoshi District Task Force züngsemtem dang renema aser kümdangshia alitsü DC-i ayongzük.

Covid-19 dak sendakba nung tekümdangtsü agütsü aser akok tashi iba wara aziüoktsü asoshi Noklak town indang lokti tentet, sector lenirtem, yimtsüing nung council aser arogo temi tongti shilem agütsüba, ta pai ashi.

Noklak nung AYUSH Hospital ya COVID-19 care center ama amshitsü asoshi telok bangjemtep. Tanga state nungi district-i arurtem (returnees) pei pei kidang anogo 10 atema quarantine asütsü mesüra anogo 3 sülen COVID-19 test agütsüba, ta teloki mulungtet.

Gari nung nüngdakba osettsüset belener driver aser parnok den teyaritertem atema tekümdangtsü mera balaka agütsüsü teloki lemtet.

Iba senden nungsa, nübun ajaki tejak nembangba mask inoktsü, Social distancing aser lokti aliba tesem nung teka metsüksü atema sapon aser tongtibangsa hand sanitizer amshitsü asoshi DTF züngsemtemi lemteta liasü.

SP Noklak, Dr. Pritpal Kaur, IPS-i, telok dang vaccine agütsü

asere COVID-19 vaccine dak sendakba nung nübun dang maneni tekümdangtsü osang sangoktsüsüla, ta metetdaksü.

SDO (C) Noklak, C. Phuniang-i, district nung Covid-19 tetuyuba aser SOP nung ajaki anidaksü asoshi ozüing takang renemtsü, ta ashi.

Khiamniungan Tribal President, M. Thangou-i, District kübok yimtsüing ajunga nung COVID-19 vaccination campaign tenzüksü asoshi telok dang mepishiogo.

Maneni, iba senden nung Medical Officer, Noklak, Dr. Chongya-i, District nung vaccine agütsüba maparen indang telok dang osang agütsü aser iba mozü agiba indang tajangzüktem metetdakja liasü.

## Rajnath-i armed...

(Tapak 7 nungi...)

Sources-isa, defence minister-i pa indang ministry nung tongtibang lenirtem den sendaktepa aruogo aser linük ajunga nung civilian administration nem koma teyari agütsüsü, iba indang sensaksemogo, ta ashi.


Kasaji Indian Air Force aser Navy ketdangsertem dena lemsatepogo aser tensa den apet jenjang agütsü atema renema alitsü shiogo.

Kasa mapang nung defence secretary Ajay Kumar-ia, civilian ketdangsertem nem armed force temi teyari agütsütetsü aliba lenmangtema asadango.

Pai ken o asadanga sülen defence ministry-i, linük kübok tesem balala nung Cantonment Board-i achayangba mozüki 67 shimogo. Item mozükitem nung cantonment nung alirtem aser kima nung alirtem nem teyari agütsüsü.

Defence Research and Development Organisation (DRDO)-i, linük ajunga nung civil administrations nem parnoki akokba tashi teyari agütsüsü ta shiatoker liasü.

## Mulungnen O



ASO:  
1923

ASÜ:  
14 APRIL 2021

ASÜR TINUNEKEN PONGEN

Onoki teti dang meima aliba obala asür Tinuneken Pongen (Chungtia), arishi küm 95 tashi lir asen Teyanglur Tsüingremi bener ogo. Kinunger kiyonger aser yimer yimsanger-i küm aika nungi tasüba anogo tashi rongsen, shisatsü, nübun aser sarasadem agi yaria aruba asoshi nenok ajak dang kanga pelaba lemsateper.

Asen Takar Tsüingremi nenok ajak moajang ta onok sarasadem.

**Temeim Chirnur, Semchirtem aser Anükapang**

## MULUNGNEN O



Asoba:  
18-12-1938

Asüba:  
16-04-2021

Onoki teti meima aliba obala/oboula Asür **Merangkaba** Rtd. D.B (Lakhuni), shirangba mapang nungi asüba anogo tashi ozü shisa bulu aser mangyim jashi nung alidang, kija, kibong, adianu, kiyonger, Arogo, yimten aser lokti kwikati nübun, rongsen aser tamang sarasadem agi yaritepogo, nenok ajak dang pelaba lemsateper.

Nenok ajak dangi tsüingdong arua pelaba meshitetakasa asen teyanglur Tsüingremi nenok mapa tajung asoshi talubosa meyipa moajang ta onok sarasadem.

**Temeim Kinungtsü, Chirnurtem, Semchirtem, Kinunger aser Anükapang**

## MENUNGRA BILEMTETER



Asür Mrs. Imnalemla  
21.04.2020 - 21.4.2021

Küm ka tejaklen nai doktsür aoba anogo ya onok asoshi tesasatiba anogo ka asü.

Na medeni iba akümüli lenmang nung onok jajadang kanga dang rongjener, saka Tsüingremi ne nem agütsüba shisatsü, tamang aser sarasadem nüktzü ajanga nai onok dang sayuba aser onok asoshi mepeshitsüba bilemtetdang onok anisüingzükter aser tashi aiter.

Kenü anogo Kibuba tsüingdong asenok ajak ajuruteptsü tamang teyimla.

**Temeim Kinungbu, Chirnur, aser Kinungertem**

## OFFICE OF THE KOHIMA KANGTSÜNG GOVT. DRIVERS' UNION

Kohima-797001 : Nagaland

### TENÜNGSANG AGÜTSÜR

**Wb. Imkongliba Ao** (Kangtsüng), Wb. Imnasü aser Wt. Odimensüla tena jabaso, Nagaland Civil Secretariat Transport Department nung Head Driver nungi Inspector jenjang tongtetba asoshi Kohima Kangtsüng Govt. Drivers' Union-i pa nem tenüngsang tulu agütsür. Iba maangka tulu ngutetba asoshi Tsüingrem tenüing asanger.

Maneni Sorkar mapa tenzükba nung tali azükaru südakjang ta Kohima Kangtsüng Govt. Drivers' Union-i sarasademtsür.

Sd/-  
**Imsu Jamir**  
President, KKGDU

Sd/-  
**Temsüshilu**  
Secretary, KKGDU



## Office of the AO SENDEN LITERATURE BOARD (ASLB)

MOKOKCHUNG - 798 601, NAGALAND  
Reg. No. HOME / SRC-6703

Ref. No. ASLB/Gen/S-06/2020-2021

Date: 20-04-21

### ASLB SANGDONG

- ASLB-i achayangba agiba Arangtet Tatidang Mezüingbubaren shiyim (form) agizüka renemer office tongtsüsüba Mokokchung, Dimapur aser Kohima ajak nung Rongchii 20, 2021 anogo tatembang liasü. Saka tang alima wara mopung asadanger koda masüba tia repringtet nung Monupii (May) 10, 2021 tashi anogo atsülangtsür.
- SCERT Textbook (Ao) class 1 - 8, class 9-12 'Orülem aser Olem' kaket office nung talitsü peria angütsü.
- Shirnoksa PGDT 703 tashi paper ajak nung takok ngur Dissertation mezülui ali Rongchii tatem tashi nung office den tongtepreatsü sangdonger.

Sd/-  
**Prof. Rev. Rongsen Lkr**  
Convenor, ASLB-AC

Sd/-  
**I. Temjen Tzüdir**  
Secretary, ASLB-AC

**ALIAYOKER**

Old Showuba area near Four Lane  
1. Per Sq.ft. Rs. 90/- 2. Per Sq.ft. Rs. 150/-  
9856603713 / 9362576107

## TENÜNGSANG AGÜTSÜR

Wb. Opangtemsu aser Wt. Alemmenla na jabaso **Dr. Alongba Jamir**-i Prof. Manoj Dutta tawabangba kübok 'Effect of mulching on soil water conservation and performance of Khasi mandarin (Citrus reticulata Blanco) in mid-hill regions of Mokokchung district of Nagaland' onük nung Nagaland University nungi **Soil & Water Conservation nung Doctor of Philosophy** takok ngua renemba asoshi Dimapur Area Chuchuyimlang Senso Telongjem (DACST) ajanga tenüngsang agütsür.

Yimtsüing nem iba ama konang tulu bener arutsüba asoshi Union-i pelaba metetdaksür aser tarutsü nunga nü wadang nung takok lidakjangma ta sarasademtsür.

**IMSUSUNGIT LONGKUMER**  
President, DACST

**J. IMLIMEREN JAMIR**  
Gen. Sec., DACST



Dimapur, Rongchii/April 20, 2021: Mongolbarnü, Jangpetkong Kaketshir Telongjem Mungdang (JKTM) ajanga 'One Day Open Penalty Shootout Tournament' ayonga asayaogo. JKTM, Tir Wb.Aoyanger Imchen-i iba asayamung lapokja liasü. Iba Penalty Shootout asayamung nung Sakus Mission College - Team B-i mezüing jenjang angu aser parnok nem senpet sen 50, 000 agütsü. Sakus Mission College - Team A-i runners up jenjang ngua par teloki senpet sen 30, 000 agizüka liasü. Kasa asaya nung Chuchang SIX Shooters Team-i 'Golden Glove' sempet angu. Noksa nung iba asayamung ayonger aser takoker tem külemi tangokba angur.

## May 1 nü WBC India Championship ayongtsü

**New Delhi, Rongchii/April 20, 2021 (Agencies):** India nung boxing asaya tsütsü asayar takotet nem sabang ka agütsütsü aser parnok ajungkettsütsü nükjidong yur, World Boxing Council (WBC)-i May 1, 2021 nü Jalandhar nung Chandni Mehra aser Suman Kumari na tsüingda Indian Championship ayongzüksü sentong lir.

LZ Promotions India Unleashed-Fight Night shilem ama, Lightweight 140lb belt atema iba asaya ayongtsü renema lir, koba linük indang mezüing Professional USA boxing asayamung ka alitsü, ta sangdong ka ajanga metetdaksü.

Lightweight aser featherweight category nung Chandni aser Suman naprongla India indang No. 1 boxer ama

shilem agia aruogo aser tebur o tetsür category anaprongla nung mezüing WBC India champion ka akümtsü asoshi iba bout nung tena tokteptsü.

Alima ajunga nung takotet boxing bout tem atema nungitba tongtibang tentet pezü rongnung WBC ka alitsü.

Iba tentet ajanga teyari agütsüba title bout atema India-i mezüing ayongzükter alitsü, kong India tetsür boxer anati shilem agütsü.

"Indian professional boxing tsütsü iba asayamung ajanga temelenshi tulu adokdaksütsü. Tetsür aser tebur 'professional boxing' telemsa nung telok anaprongla dak sempet tajung aser tashi lir ta amanger. India indang mezüing World Boxing Champion (tetsür aser tebur) ajungkettsütsü asoshi nükla lir,"

ta LZ Promotions aser India Unleashed Promoter indang CEO Parm Goraya-i ashi.

"Pawan Goyat, Pawan Maan aser Asha Roka nungeri tongtibang sabang nung asayaogo. Iba mapatong asoshi kanga janrar aser India nung boxing aser professional boxing atema otsü yanglutsüsa shilem agütsü teimla lir," ta Parm-i ashi.

"Indian professional boxing atema WBC India Championship yagi lenla aisü nung nungitsü. Iba den külemi, 'title card' ajanga India nung boxing aser professional boxers atema temelenshi tulu adokdaksütsü," ta Indian Boxing Council (IBC) indang president, Muralidharan Raja-i ashi.

Tawa, WBC indang Asian wing ajanga IBC affiliate süogo.

## NRAI-i asayartem nem COVID-19 vaccine agütsütsü mepeshi

**Rongchii/April 20, 2021 (Agencies):** National Rifle Association of India (NRAI)-i, COVID-19 tashidak menar tali akümba temulungdang yur sorkar dang Olympics nung asayatsü aliba shooter tem nem takaratiba nung vaccine agütsütsü mepeshia asüngdangogo.

Union health ministry data ajanga India nung taoba ghonda 24 tsüingda nisung 2,73,810 dak tashidak potetba sayuogo. India nung tang tashi nung nisung crore 1.5 dak tashidak menaogo.

Kasa mapang nung taoba ghonda 24 tsüingda India nung Covid tashidak agi nisung 1,619 süogo.

Tensa apir NRAI-i asayartem nem takaratiba nung vaccine agütsüdaksüner.

"Asayartem nem vaccine

takaratika nung agütsütsü atema federation-i mepeshia arudar aser maneni sorkar dang shooter tem nem vaccine agütsütsü mepeshia asüngdangogo," ta NRAI den sendaka aliba source kati ashi.

"Vaccine agütsü ya pei mulung ta onoki angateta lir, ajisüaka sorkar tejakdang ser asayartem ajungmesotetra parnoki vaccine agütsü mulunga agizüksü. Tashidak kanga kara prokshia aoer asünung tangbo tanga lenmang kecha mali," ta pai ashi.

Tawa Olympics nung asayatsüpur shooter asem dak tashidak potetba sülen NRAI-i parnok nem vaccine agütsütsü kanga mepeshia arudar. Asayartem dak tashidak potetba sülen Mongolbarnü nung linük yimtiba nung rifle

team national camp ayongzüka agütsü sentong yanglur aliba thitsüogo.

Iba melena parnoki bendanglen oa training-cum-competition nung shilem agütsü telemtetba agiogo, kong European Championships nung shilem agütsü aliba densema lir.

NRAI-i iba ita mezüingbuba hopta Tokyo Games asoshi asayar 15 shimba metetdaksüogo.

COVID-19 ajanga tensa mejangiaba ajanga asaya ajak atema reserve shooter anana shimogo. Parnok ajak nem Olympics nung asayatsüpurtem den kasa dang training agütsütsü.

Taoba ita India team-i ISSF World Cup, Delhi nung gold medal 15 densema medal 30 koktetogo.

## Simranjit Kaur dak Covid-19 putet

**New Delhi, Rongchi/April 20, 2021 (Agencies):** Ajaki yongya ataba Tokyo Olympic atema India tsür boxing team renema aliba mapang ka nung asayar ka dak Covid-19 tashidak putet. Sangdong ajanga angazükba agi, aruya aliba Olympics atema quota ngur alila Simranjit Kaur (60kg) dak coronavirus positive tendangtet.

Tokyo Olympics atema India tetsür boxing team pugilist rongnung la dak mezüing iba tashidak puteter alitsü. Taoba küm March ita Asian qualifiers asayamung nung Simranjit-i Olympic quota angu.

Training camp nung high-performance director Raffaele Bergamasco aser head coach Ali Qamar densema tetsür boxer 21 aser support staff tem dak Covid-19 positive putetba sülen, Sports Authority of India (SAI)-i Olympic nung shilem agütsüpur pugilists aser camp nung shilem agirtem, shirnok dak RT-PCR tendangba nung negative putet, parnok ajak Jawahar Lal Nehru stadium agi belenogo.

Iba Stadium-i aoer rongnung Simranjit dak alaka, Olympic atema temsüa kümer alila, Lovlina Borgohain (69kg) aser Pooja Rani (75kg) nunger dena lir.

Trokben-buba world champion aser quota ngur alila, MC Mary Kom ya la indang nija coaching staff den balaka nung training agidar.

Simranjit dak Covid-19 positive putetba sülen, tekolakpurtemi mapang tatsüka atema Olympic nung shilem agütsüpur tetsür boxer indang training camp anena atatsü lemtet aser Lovlina o Pooja naprongla dang iba camp toktsür pei pei talidaki aotsü asoshi shiogo.

Lovlina aser Pooja naprongla dak Covid-19 negative tendangtet.

Tokyo Olympics atema India tetsür boxing team renemshiba mapang ka nung boxer ka dak Covid-19 putetba ajanga tetsükdaksü tulu adokdaksüogo.

Taoba mapang, iba Camp nungsa asayar aika dak Covid-19 putetba ajanga India boxer team pur training den repsema Serbia nung asayamung ka agütsü aliba thinena liasü.

India tebur boxing team nungi, Olympic nung shilem agütsü asoshi renema alisang 'middleweight category' boxer Ashish Kumar-i taoba ita Spain nung Boxam international meet nung shilem agiba mapang, pa dak Covid-19 puteta liasü.

Tang, külem India nunger aser Tokyo atema quota ngur alisang Amit Panghal-i anir zungsem 8 tebur boxing contingent kati Governor Cup nung shilem agütsü renema lir. Iba asayamung St Petersburg, Russia nung asayatsü.

"Covid-19 positive puteter athlete tem quarantine nungi adokba sülen, temang nung iba wara dak sendakba timtem aliba mesayutsü atema parnok ajaki D-dimer, ECG aser HCRT scan agiba osang tejangja sayutsüla," ta St Petersburg nungi India tebur team indang doctor, Karanjeet Singh-i ashi.

"Covid-19 tashidak positive puteter, saka iba wara temaitsü agi temang nung timtem maliba athlete tem D-dimer aser ECG atema tendangtsüla. Ano külen, tashidak temaitsü alir athlete tem HCRT scan agiba osang sayutsüla. Item test ajak ajangetba (Covid-19 negative) sülen ang, athlete tem traning tenzükshitsü asoshi melatsü. Athlete tem tanaben tendanger negative putetra, parnok dak kodanga Covid-19 wara agi memeneptsü ta mali aser asenoki aji angatetsüla," ta Karanjeet-i ashi.

Maneni, tanga sangdong ka ajanga angazükba agi, Olympic nung shilem agütsüpur India nunger shooter ana dak Covid-19 positive putet, saka tena rongnung kabo taneptsü nguogo. 10m air rifle shooter Deepak Kumar, shiba dak Covid-19 putet, pa anepaludar aser kasa mapang 25m pistol shooter Rahi Sarnobat taneptsü nguogo.



Kielce, Rongchii/April 20, 2021: Mongolbarnü, AIBA Youth Men's & Women's World Boxing Championships asayamung nung India tsür Babyrojisana Chanu (achiji) aser European Youth Champion Alexas Kubicka na tsüingtepba mapang agiba noksa ka yangi angur.

## BILEMDANGANG

"Mapa tajung kabo inyaktettsüsa nü dak sempet lir ta amangang."